

Wer war der Daume Hans ?

Er war so an die vier finf Jahr alt, wie ich ne zum eerschtimol gsiehn han. Der Zeit ich mich an ihne Erinnere kann, hat er bei uns in dr Daume Gass gwohnt, drum hat mer ne ach immer Daume Hans gnennt. Phaar Jahr speder is er dann Thoma Hans im Dorf geruft gin. Sowie mer vun em Dorfrichter gheert hat, is jo der Hansi uf a ganz anere Name, im Geburtsschein ingschrieb gwen. Er hat noch a Schwester ghat, die awer bei weitm net so Schlimm wie er war. A Vater han die zwei Kinner schun aach ghat, nor wie der gsiehn hat, wieviel Arweit un Mieh in so eener Kinner Erziehung drinn gstoch hat, hat er sich aus,m Staab gmacht, un hat sich niemehr gsiehn glosst. No Johre wann mer dann denn Hansi gfroot hat wu dann sei Vater is, noh hat,r immer gsaat, denn han die Kraake gfress. Die Motter vun deni zwei, hat mit ihrem Mädlname Thoma Magdalena gheest, un war, so wie mer heint zu Taach saat, a Alleinerziehnti Motter, un hat schwer Arweite misse, dass se vor die Kinner a halbwegs Sorcheloses Lewe hien griet. Wann de Hansi so dorch die Gass gschluurt is, hat er zumeischt im Summer nix wie a Scheckiches Hemet un a korzi grieni rippichi Samethosse, die a bisl iwer die Gnie gang is, anghat, an die Fieß war er im Summer immer blosfießich rum geloff. A phaar Schritt hine im is sei Hund mit gloff, der ach nor immer in die hee, grad so wie sei Herr, gschaut hat. Alli zwei ware ganz scharf uf die Spatze, Kraake Atzl, un anri Vögl Neschter gwen. Un wann se ens endeckt han, war ach schun de Hans owe in die Beem, derweil sei Hund une gsitzt hat, un owacht gin hat, ob niemand kummt, der ihne des Hopy instelle will, Wann die Sunne Blodre gebrennt hat, war er immer de erschte was im Wasser, in dr Kaul glee hat, un sich abgekhielt hat, aach do war sei Hund derbei un hat owacht gin das sei Gwand net, vun em annere Buu ins Gebisch versteklt git. Noo dem Bade, wann er Luscht ghat hat, is er sogar manichmol, korzi Strecke, uf die Händ dorch die Gasse gang. Un weil sei Motter wenich Zeit ghat hat vor uf ne owacht gin, is de Hansi a schlimme un dorchgetriewen Buu eene gin. Er hat jo noch a Großvater ghat, der noch wenicher Zeit ufgebrung hat, vor uf ne owacht gin, awer aach ,m die richtichi Erziehung beibringe sellt. Der hat mehr engschter ghat vun dr Arweit, wie de Hansi vum Garteweiw. Er is vun seim Großvater, weil jo sei Vater net doo war, wenichstes enmol in dr Wuch, uf die Bank gleet gin, die im Gang gstann hat, un uf seim Hinnere is die Ruud solang rumgetanzt, bis seim Großvater die Händ weh getun han. Nooher is,r dann in de Keller gworf gin, der noo a langi Zeit abgspeert war. Es is gar oft passiert, dass ne sei Schwester vun dort rausglosst hat. Er hat nor desweje die Schlee griet, weil er schun wieder vergesst hat, vun lauter spiele mit m Kleen Adam, die Maulpiere zamraffe, mit deni der Alt Racki brenne hat wille. Es anermol, wie er schun nomol uf die Bank gleet gin is, hat de Hansi seim Großvater de faule Käs verdorb, denn er mitm Juli Hans esse hat wille. Er hat glei wie er gsiehn hat,

dass sei Großvater den Käs angesetzt hat, a guti portion Gerwe ningmisch, der Käs hat dann anfangt zu Gäre, un war noh vor esse nimi gut. Dann vor es nomol passier, hat de Hansi seim Großvater a Bild vun eem alte Buch, wu a Weib drowe war, die gar khe Gwant anghat hat, mit Honich uf de Buckl gephickt, wie er unerem Nussebaam sei Mittachschoof abghall hat, noh her is, der alt in s Dorf gang, wu noh die Leit, vun hinne uf ne gezeigt han, un glacht han. Weil sei Großvater ach Biene ghat hat, hat,r jo den Honich net kaafe breiche. Des war dann schun wieder a Grund vor schleer grien, un in de Keller ingsperrt zu gin, Dem Hansi sei Großvater hat immer wieder gsaat, wann die Dorfsleit ne gfroht han, was dann aus dem Hansi gibt?, noh hat,r immer gsaat, dass der a Taugenichs gibt, aus dem werd a nix. . Enmol hat sei Großvater Bilder ausgaarweit, weil Fotograf war er aach, do hat de Hansi dem alt die Tühr vun der Dunklkammer vun ausewenzich abgsperrt un is vun derhem fortgelooff. Was noh dem passiert is, kann sich a jeder jo vorstelle. Wie de Hansi in die Schul gang is, hat mer sich vorgstellt, dass ihm jetz die Zaam angezoo wäre, es lerne war aach in der Schul net sei Ding, un die Mieh, was sich die Lehrer gin han, war zumeischt umasuncht. Am beschte hat er sich mit,m Pharre verstant, der hat ne noch anglehrt, was mer noch alles mache kann, dass die Leit im Dorf sich erchere, er hat,m gezeigt wie mer mit die Akazie Blätter die Mauer anschreibe kann, wie un wann mer aus die Leit ihrem Garte die Zeitichi Sieskersche holle kann, un so vieles anneres. Un wie de Hansi, es erschtimol in der Kerch geraacht hat, war die freindschaft zwischer em Pharre un ihm am end. Ich han mer,s vorkholl, un wollt rausfinne, wer der Thoma Hansi iwerhaupt war, un han, noh, langer nohforschung rausgfun, dass der jo ich bin.